

Posbus 281  
Paarl 7620

Faks: (021) 872 8654

Telefoon: (021) 872 1541

*Hoërskool*



Sedert 1858

*Gimnasium*

Hoofstraat 416  
Paarl 7646

www.paarlgim.co.za

admin@paarlgim.co.za

## **KOSHUISBRIEF : NOVEMBER 2020**

Geagte Ouers

Dit is met die grootste dankbaarheid waarmee ek die afgelope jaar in oënskou neem. Ten spyte van die unieke uitdagings wat die COVID-19-pandemie aan ons gestel het – en steeds vir die afsienbare toekoms aan ons gaan stel – kan ek met oortuiging verklaar dat ons koshuiskultuur kerngesond is. Dit was 'n lang stryd om die negatiewe en afbrekende gebruike hok te slaan en te vervang met ware mentorskap waarin ons matrieks die leidende rol speel. Ek kan egter nie nalaat om my dank uit te spreek teenoor die onderskeie superintendente wat oor 'n lang periode besonder toegewyd gewerk het aan hierdie omkeerplan nie. Nou is die uitdaging om die nuwe koshuiskultuur in stand te hou en te versterk.

Dit was egter ook 'n jaar waarin ons koshuisfinansies vir die eerste keer in 25 jaar onder druk gekom het. Ons het gewoon geraak daaraan om addisionele inkomste te genereer deur die verhuring van ons koshuise gedurende skoolvakansies – iets wat hierdie jaar glad nie gerealiseer het nie. Dit het 'n R1.5 miljoen tekort op ons koshuisinkomstebegroting gelaat. Hierdie tekort gaan dus uiteraard oorspoel na 2021 en ons sal gevolglik op alle terreine moet bespaar en nougesette kontrole oor ons koshuisfinansies moet handhaaf. Ons pleit dus vir elke ouer en koshuisleerder se samewerking in hierdie verband. Vandalisme of moedswillige beskadiging van ons koshuise is 'n realiteit. Instandhouding kos ons jaarliks ± R1 miljoen. Daarom versoek ons alle ouers om ernstig met u kinders te gesels oor hierdie onderwerp.

Dit is ook weer daardie tyd van die jaar wat almal begin afskaal en gereedmaak vir 'n lekker en welverdiende ruskans. Mag elkeen saam met hulle gesinne 'n feestelike en geseënde wegbreek beleef. Dit is egter ook die tyd van die jaar wat ons moet beplan en reëlings tref vir die nuwe akademiese jaar. Ek bring dus graag die volgende belangrike sake onder u aandag:

### **1. Kredietwet**

**Sien asb meegaande inligtingstuk aangaande die implikasies van die NASIONELE KREDIETWET op alle rekeningpligtiges. Let asb veral op dat koshuisgeld streng vooruitbetaalbaar is. Debietorders loop dus reeds op 2 Januarie. Alle direkte kontant- en internetbetalings moet ook reeds in Januarie plaasvind.**

## 2. **Losiesgeld vir 2021**

Baie dankie aan elke ouer wat sy / haar finansiële verpligting teenoor die koshuise getrou nagekom het.

Die koshuisgeld vir 2021 is deur die beheerliggaam vasgestel op R49 100 per leerder per jaar (R4 910 per maand oor 10 maande).

Ons is dankbaar dat ons ten spyte van moeilike finansiële omstandighede sodanige beheer- en kontrolemaatreëls in plek het dat ons koshuisgeld relatief laag kan bly. Ons koshuis bied aan sy inwoners net die beste. Ten spyte daarvan is ons koshuisgeld steeds laer as ander vergelykbare skole s'n.

Hierdie prestasie is slegs moontlik deurdat almal betrokke by ons koshuise met groot verantwoordelikheid optree en die meerderheid van ons kinders saamwerk om ons koshuise 'n ordelike en netjiese plek te hou.

**Ouers moet asb kennis neem van 'n besluit van die skool se beheerliggaam dat koshuisleerders hul plek in die koshuise verbeur indien koshuis- EN / OF skoolgeld agterstallig raak.**

## 3. **Betaling per debietorder**

Ons wil baie sterk aanbeveel dat u u kind se losies per debietorder betaal (sien opsies van betaalwyses) aangesien dit die volgende voordele inhou:

- Dit is 'n baie gemaklike en moeitevrye manier van betaal
- Die risiko verbonde aan die hantering van kontant word uitgeskakel
- U debietorderaanvraag is beskerm teen bedrog, aangesien dit via die internet aangevra word
- Dit verbeter die koshuise se kontantvloei en pas gemakliker in by die kontantvloei van ouers wat van 'n maandelikse salarisinkomste afhanklik is
- U hoef slegs 'n eenmalige debietorder-magtiging te teken wat geldig bly vir die volle duur van u kind se verblyf in ons koshuise
- U kan die debietorder-magtiging te enige tyd kanselleer of wysig deur dit skriftelik onder ons aandag te bring
- U betaling sal altyd betyds wees – wat voordele vir u en die koshuise inhou

#### 4. Opsies van betaalwyses

**Ouers van graad 12-leerders (2021)** moet asb daarop let dat hulle volle koshuisrekening vereffen moet wees teen die einde van die DERDE skoolkwartaal. Indien die volle rekening nie op die genoemde datum vereffen is nie, mag die betrokke leerder nie vir die vierde kwartaal terugkeer na die koshuis nie. Ouers wat maandeliks betaal, moet dus 9 betalings (Jan – Sept) van R5 456 per maand maak en diegene wat per kwartaal betaal, moet 3 betalings – soos op die datums hieronder uiteengesit – van R16 367 elk maak. Geen kortings word toegestaan nie. Alle agterstallige gelde sal op die eerste skooldag van die vierde skoolkwartaal aan ons skuldinvorderaars oorhandig word wat tot gevolg sal hê dat die wanbetaler geswartlys word.

U kan uit die onderstaande opsies kies watter betaalwyse u die beste pas:

##### 4.1 **MAANDELIKS PER DEBIETORDER**

Voorwaardes :

4.1.1 Betaling geskied in 10 gelyke betalings – die eerste in Januarie en die laaste in Oktober (R4 910 per maand per leerder)

**Ouers van gr 12-leerders moet 9 betalings van R5 456 maak (sien nota bo-aan hierdie bladsy)**

4.1.2 Betaling geskied op die eerste dag van elke maand

4.1.3 Indien u debietorder afgewys word, moet u voor die 15e van die betrokke maand per EFT of kontant betaal.

##### 4.2 **VIER KWARTAALBETALINGS (SELF OF PER DEBIETORDER)**

Voorwaardes :

4.2.1 Betaling geskied in vier paaiemente van R12 275 elk:

4.2.2 Betaling moet geskied voor of op die volgende datums:

**15 Januarie 2021**

**15 April 2021**

**15 Julie 2021**

**15 Oktober 2021**

**Ouers van gr 12-leerders** se betalings moet op die eerste 3 datums gedoen word (sien nota bo-aan hierdie bladsy)

Debietorders word outomaties oorgedra van een jaar na 'n volgende (tensy u anders reël).

### 4.3 **SELF PER MAAND**

#### Voorwaardes :

4.3.1 Betaling geskied in 10 gelyke paaiemente – die eerste voor 15 Januarie en die laaste in Oktober (R4 910 per maand per leerder)

4.3.2 Betaling geskied kontant of elektronies op die eerste dag van elke maand, met Januarie as die uitsondering.

### 4.4 **JAARLIKS**

#### Voorwaardes :

4.4.1 Betaling geskied **voor of op 14 Februarie 2021** kontant of elektronies

4.4.2 Neem asb kennis dat 'n kontantheringsfooi van R20 per R1 000 betaalbaar is op alle kontantbetalings groter as R1 000

LW: Hou asb streng by die gekose opsie

Indien u kontantvloei-probleme ondervind en nie op 'n spesifieke datum kan betaal nie, moet u asb VOORAF 'n skriftelike ooreenkoms vir die betaling van die agterstallige geld tref. Rekeninge word oorhandig aan ons prokureurs indien dit op 90 dae te staan kom. Indien 'n rekening oorhandig word, verbeur die betrokke leerder sy / haar losies met onmiddellike effek. Daar sal dan van die rekeningpligtige verwag word om heraansoek te doen vir losies. Die aansoek sal slegs oorweeg word indien die rekening op datum gebring word en 'n nuwe betalingsooreenkoms met die rekeningpligtige gesluit is.

## 5. **Koshuisnaweke vir 2021**

KWARTAAL 1 :       27 Januarie – 31 Maart  
05 – 07 Februarie       Week 2  
05 – 07 Maart            Week 6

KWARTAAL 2 :       13 April – 25 Junie  
23 – 27 April            Week 2  
21 – 23 Mei              Week 6

KWARTAAL 3 :       13 Julie – 23 September  
06 – 09 Augustus        Week 4  
03 – 05 September      Week 8

KWARTAAL 4 :       05 Oktober – 08 Desember  
22 – 24 Oktober         Week 3  
19 – 21 November       Week 7

**LW :** Alle kosgangers moet die koshuis gedurende hierdie naweke verlaat. Die koshuis sal om 17:00 gesluit word op die dag waarop die naweek begin en weer op die dag waarop die naweek eindig om 16:00 oopgesluit word. Indien ouers hul kinders vroeër moet aflaai, moet dit asb persoonlik met die onderskeie superintendente gereël word. Ontbyt word op die laaste oggend voor die naweek begin, bedien en dan eers weer op die oggend na die naweek.

## 6. **Selfone**

Selfone is 'n probleem wat ons moet bestuur. Indien u u kind skakel, dra asb sorg dat u dit slegs tydens vrye tyd doen. Tydens stiltetye, studietye, etenstye en na ligte-uit mag geen selfoonoproep gemaak of ontvang word nie.

Selfone en ander waardevolle artikels word op eie risiko aangehou en kan nie van die koshuis geëis word in geval van diefstal of elektriese skade nie. Spesifiseer dit asb op u eie versekering.

## 7. **Naweke**

- Naweekopnames word elke Woensdag gedoen.
- Geen leerder mag die skool voor uitkomtyd op Vrydae verlaat nie.
- Leerders mag slegs deur hul eie ouers uitgeteken word vir naweke of, in die geval van saamrygeleenthede, deur die volwassene wat deur die ouer skriftelik genomineer word. Sodanige skriftelike toestemming moet die onderskeie koshuise voor 13:00 (of voor vertrek indien die skool om enige rede vroeër sou uitkom) bereik.
- Neem asb kennis dat ons voortgaan met die gebruik van die Google-vorm vir uitteken van leerders soos vroeër vanjaar aan ons huidige ouers gekommunikeer.
- Leerders moet óf in *volle* skooldrag, óf ten volle in siviele drag geklee wees as hulle die koshuis verlaat vir die naweek.
- Leerders wat eers op die Maandagoggend inkom, moet in **volle skooldrag** afgelaai word – gereed vir die skooldag.
- Indien u kind op 'n spesifieke naweek wil inbly, is hy / sy welkom om dit te doen en geld alle naweekreëlings vir hom / haar.
- Dit staan u as ouer egter vry om u kind op enige tydstip by die koshuis te kom oplaai indien u die Paarl of omgewing besoek. U moet asb net te alle tye persoonlik met die betrokke superintendent reël **voordat** die koshuis verlaat mag word.
- Al bogenoemde is te alle tye onderhewig aan die uitsluitlike voorwaarde dat u kind geen sport- of detensieverpligtinge het nie.

## 8. **Verlaat van koshuis gedurende die week**

- Vanweë die groot ontwrigting wat veroorsaak word deur ouers wat hul kinders op enige weksdag sonder verlof uit die koshuis neem, word hierdie gebruik ten sterkste ontmoedig.
- **Die Superintendente, Hoof, Koshuishoof of Beheerliggaam aanvaar geen verantwoordelikheid vir enige leerder wat die koshuis sonder verlof verlaat nie. Ons verwag van alle ouers om 'n ooreenkoms in hierdie verband te onderteken.**

## 9. **Siekte**

- Indien u u kind wil huistoe neem vanweë siekte, moet u die onderskeie Superintendente asb in kennis stel **voordat u kind die koshuis verlaat**
- Indien u kind siek word terwyl hy / sy tuis is, moet u die onderskeie superintendente onmiddellik in kennis stel
- Indien u in gebreke bly om die koshuise hiervan in kennis te stel, sal dit beskou word as die wederregtelike verlaat van die koshuis

## 10. **Partytjies op weksdae**

- Geen kosganger sal toegelaat word om op weksdae partytjies by te woon nie
- Indien u kind verjaar, staan dit u vry om hom / haar en u ander kind(ers) vir die aand uit te neem, maar geen ander kosganger sal toegelaat word om u te vergesel nie. Geen uitsondering kan in hierdie verband gemaak word nie
- Neem asb ook kennis dat koshuisleerders nie toegelaat sal word om deur enige persoon anders as hul eie ouers in die onderskeie koshuise uitgeteken te word ná weksdagfunksies / -byeenkomste soos Prestige Atletiek, Ma-en-Dogterdag, Prysuitdeling, Mnr & Mej Interskole, ens. nie. Indien u u eie kind wil kom uitteken, aanvaar u volle verantwoordelikheid.

## 11. **Studeerlampies / Bedlampies**

- Studeerlampies is 'n voorvereiste vir alle leerders wat toegelaat word om in hul kamers te studeer
- Ons beveel egter aan dat alle leerders bedlampies aanskaf vir studiedoeleindes

12. **Elektriese apparaat**

- Dompelaars, ketels, koelkaste, lugreëlaars en elektriese komberse word nie toegelaat nie
- Slegs haardroërs en waaiers (**1 per kamer**) word toegelaat
- Slegs verwarmers wat warm lug uitblaas is toelaatbaar. **LW : Geen verwarmers met oop elemente of 'n oop hittebron nie (1 per kamer)**
- Lugreëlaars (in enige vorm) word nie toegelaat nie
- Urns/ketels, mikrogolfoonde en koelkaste is in die gange beskikbaar

13. **Vroeë vertrek met vakansie**

- Geen koshuisleerders mag die skool voor **11:00** op die dag waarop die skool sluit, verlaat nie – tensy ander reëlins betyds deur die skoolhoof aan ouers deurgegee word
- Geen vergunning sal in hierdie verband gemaak word nie
- Geen vraestelle mag vroeër geskryf word nie.

14. **Vervoerreëlins voor en na vakansies en tuisnaweke**

- Alle vervoerreëlins moet **minstens 5 skooldae vooruit** regstreeks **deur die ouers** aan **mev Ilze Stoman** ([ilse@gimkoshuise.co.za](mailto:ilse@gimkoshuise.co.za)) deurgegee word
- Vervoer sal slegs verskaf word na busse en die lughawe op die tye wat vooraf bepaal word
- Vervoer sal slegs verskaf word voor en na skoolvakansies en uitnaweke
- Ons koshuispersoneel is ook geregtig op private tyd tydens uitnaweke en skoolvakansies en daarom sal dit slegs billik wees om reeds voor die vakansies en uitnaweke ook die terugkomreëlins te tref.
- Vervoer na busse wat vanuit die Paarl vertrek, sal gratis verskaf word. Vervoer na Malmesbury sal verskaf word teen R80 per rit en die lughawe teen R150 per rit aangesien die koshuis die bestuurders vir hul diens moet vergoed en die busse by die Trust moet huur.
- Geen leerder sal vervoer word sonder 'n inbetalingsbewys wat deur mev. Koeka Dedekind uitgereik sal word na betaling nie.

15. **Digitale kluiise**

Kluiise kan gehuur word teen R200 per jaar. By betaling van die huurgeld sal elke leerder 'n persoonlike kode ontvang vir gebruik van die kluiise.



## 16. Gedragskode

Die koshuise se gedragskode is op ons webtuiste beskikbaar. Hierdie gedragskode dien as 'n kontrak wat tussen die koshuise en die ouers van koshuiseleerders aangegaan word. Ouers moet asb kennis neem dat die toepassing van dissipline in die koshuise nie onder die bepalings van die SA Skolewet val nie, maar dat dissipline in koshuise die direkte verantwoordelikheid van die SBL is. **Neem asb ook kennis van 'n besluit van die koshuiskomitee dat leerders wat 135 punte in 'n akademiese jaar verwerf, hul plek in die koshuis verbeur.**

## 17. Vestiging van 'n akademiese kultuur in die koshuise

Akademiese prestasie is vir ons ononderhandelbaar. Daarom het die Koshuiskomitee besluit dat slegs ons akademiese toppresterders per kwartaal toegelaat sal word om in kamers te studeer. Die afsnypunt word bepaal deur die aantal kamers wat vir studie beskikbaar is. Die res van die leerders sal in die studiesale onder toesig van die diensonderwysers studeer. Alle graad 12's sal aanvanklik toegelaat word om in kamers te studeer, maar sal onmiddellik na die studiesale verskuif word indien hulle nie hul studietye maksimaal benut nie. Geen ontwrigting van studie sal toegelaat word nie. Die superintendente het reeds op verskeie insentiewe besluit om leerders wat akademies vorder en/of presteer, te beloon. Persoonlike terugvoer en motiverende gesprekke sal ook met onderpresterders gevoer word. Ons versoek alle ouers om hierdie projek ten volle te ondersteun en 'n aktiewe bydrae te lewer om te help om die gewenste akademiese atmosfeer in ons koshuise te vestig.

## 18. Nuwelinge

Alle inligting aangaande die ontvangs van graad 8's en die graad 8-kamp sal gedurende die eerste week van Desember per e-pos gestuur word en op die koshuise se webtuiste beskikbaar wees. Alle ander nuwelinge en alle gr 9's moet tussen 14:00 en 16:00 op Dinsdag 26 Januarie by Huis McFarlane en Huis Bruwer onderskeidelik aanmeld.

## 19. Telefoonnommers

Ek verstrek graag die volgende belangrike telefoonnommers vir direkte kontak:

Huis McFarlane

Dogterssuperintendent :	Mev Momsen	076 237 0000
Seunssuperintendent :	Mnr Stemmet	082 559 9024
Admin (tydens skoolure):	Mev Dyason	021-872 3870



Huis Bruwer  
Dogterssuperintendent : Mev Van den Berg 083 294 8147  
Seunssuperintendent : Mnr Burger 074 716 7598  
Admin (tydens skoolure): Mev Thyssen 021-870 1304

Huis Kalahari Visser  
Dogterssuperintendent : Mev Myburgh 082 325 3573  
Seunssuperintendent : Mnr Eksteen 083 565 0313  
Admin (tydens skoolure): Mev Pretorius 021-872 4066

Ek, my gesin en die koshuispersoneel wens u 'n vreugdevolle  
Feesgety en 'n voorspoedige 2021 toe.

Groete

**ANDRÉ OBERHOLZER**  
**KOSHUISHOOF**  
**2020-11-11**